



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Jannik Sinner-i Miami Open final nung Lehecka kokogo

Min Aung Hlaing-i Myanmar junta tekolakba mapa toktsüogo



VOL. XXIII ISSUE NO. 167 (ADOK 167) DIMAPUR SANGTENNÜ (TUESDAY) METSÜREMI (MARCH) 31, 2026 ₹ 5.00

State sorkar dang NFRCC jaoktsü tuyur Centre aser state sorkari Nagaland nung MSME renloktsü meranger

Dimapur, March 30, 2026 (TYO): State sorkari Foothills Road aser Right of Way (ROW) temenok atema telok balala den senden amentsü ayongzükba nung Nagaland Foothill Road Coordination Committee (NFRCC) jaoktsüla ta Nagaland nung kin hoho 13-i metetdaksüogo.

Sorkari April 7, 2026 nü ayongba senden nung NFRCC mejaokra onok madentsü lemtetogo ta Lotha Hoho General Secretary, Er. Limahathung Odyuo-i Hombarnü ashi.

Tanü senden ka amendang onoki iba lemtet agiogo. 2013 nung Foothill Road takok ngua

yanglutsü atema Tribal Hoho 13-i mulung iba Committee tentet ta paisa ashi.

Onoki April 7 tashi sorkar nungi telangzüba atatsü aser kecha mengura ozüangi melaba ama lungkak aittsü ta paisa metetdaksüogo.

Tesüiba nung NFRCC-i Nagaland Chief Minister dangi shidi ka zülüogo aser iba nung March 31, 2026 matongdangsa Foothills Road atema SASCI kübok 2nd phase work order agüjang ta takhangba agütsüogo.

Sorkari iba mapa meinyakra Naga kin 13 prong ozüangi melaba ama lungkak aittsü ta NFRCC-isa shiogo.



Dimapur, March 30, 2026 (TYO): March 30, 2026 nü Chief Secretary indang Conference Hall nung "MSME as Engines of Growth" ta ser senden tajung ka menogo.

Iba senden nung India sorkar aser Nagaland nung agri. and allied departments nungi ketdangsürtem aden.

Senden nung mendenji Additional Chief Secretary & Agriculture Production Commissioner, V. Shashank Shekhar (IAS) liasü aser Centre o State tsüngda tesentaktep akangshitsü atema iba senden ayonga amener ta ashi.

Nagaland nung MSME aintsü atema department balala tsüngda amalitepa aser yaritepa inyaksü nüngdaker ta Ministry of Micro, Small and Medium Enterprises (MSME), Government of India, Secretary, S.C.L. Das (IAS)-i senden nung ashi.

"Iba senden ya meyipa reprangshiba indang masü saka olemteptsü aser tesentaktep yanglutsü atema sabang ka lir. Nagaland tejakleni aoba ya India renlokba nung shilem ka lir aser Nagaland tejakleni aoba nung India sorkari pusema nungiter" ta Das-i ashi.

"MSMEs ya department ka nung dang masü saka wadang balala temeyoktep lir. MSME ya textiles, food processing, steel, electronics aser tanga industries den sendaktepa lir. MSMEs

ajanga wadang balala nung shilem agir aser linük rongsenketzüng asoshi kanga tongtipang" ta paisa ashi.

Asenoki department telemsa agientsüka aser külemi yaritepa inyaksüla kechiyong Centre aser State nung ministry aser department aikati MSMEs ajangzüksüba indang schemes inyaker ta Das-isa metetdaksü.

"Iba senden ya tetenzüker dang lir aser tarutsü nung maneni asenok ajurutepa maparen tajungba inyaka aotsü. State sorkari onok agizükba atema pelar aser iba sensaksem ajanga telok anaprongi jenti angazükogo" ta paisa shisem.

Senden nung Ministry of Micro, Small and Medium Enterprises (MSME), Government of India Joint Secretary Mercy Epao-i Ministry indang mangdang lemsatepdang "India rongsenketzüng renlokba nung MSMEs ajanga tongti shilem agir" ta ashi.

"Ministry indang mission ji Khadi, Village aser Coir industries dena MSMEs aintsü aser renlokdaoktsü atema lir. Onoki enterprises tasen tenzüksü aser mapa adokdaoktsü aser linük nung manufacturing base akangshitsü atema meranger" ta lai ashi.

Ministry kübok PM Vishwakarma, Credit Guarantee Scheme for Micro and Small Enterprises, Self Reliant India

(SRI) Fund, Micro and Small Enterprises Cluster Development Programme (MSE-CDP), Prime Minister's Employment Generation Programme (PMEGP), National SC-ST Hub Scheme (NSSH), International Cooperation Scheme (IC), aser Assistance to Training Institutions (ATI) schemes lir ta Mercy-isa metetdaksü.

"Yashasvini initiative ajanga tetsürtemi aniba enterprises tashi itdaksütsü nükjidong lir. Tetsürtem meyong MSEs nungi sorkari 3% alizüksü aser informal nungi formal enterprises tashi tetsür entrepreneurs yaritsü atema iba scheme tenzükogo" ta laisa ashi.

Viksit Bharat 2047 kübok onoki India renlokba nung MSME sector ya tongtipang kümdaksütsü alizüng lir ta laisa shisem.

Senden nung Nagaland department balalai parnoki inyaka aruba osangtem lemsatep aser teyari nüngdakba tebilemstü ashi.

Iba senden nung Development Commissioner, Industries & commerce, Tourism, Horticulture, Fisheries, RD, Finance, IT & C, Land Resources, Women Development, Forest, Nagaland Bamboo Mission, Employment & Skill Development, Youth Resource & Sports, Seri culture, Agri department tem aden.

Tangkhul Naga Long-i Hongbei lendong atema ghonda 12 züngzüksür

Imphal, March 30, 2026 (Agencies): Tangkhul Naga nung tongti telok Tangkhul Naga Long (TNL)-i Kamjong district nung Naga Army pezü kshateritem meshir.

TNL-i March 30, 2026 nü Tangkhul civil organisations külem senden ka ayonga amen aser iba sülen tanü nikongdang 2:00 ako nungi tenzükker ghonda 12 tsüngda nisung kshateritem parnok ket nung agütsütsü mapang züngzüksüogo.

TNL-i temulung melemi bilemer ana- Sihai Khunou nung Athot aser Lairam Khullen nung Star na taküm aser temang shitak nung parnok ket nung agüjang ta shiogo.

Iba takhangba ama meinyakra Tangkhul nungeri Wung Tangkhul Region den amalitepa malitsü ta TNL-isa metetdaksü.

Naga Army indang Eastern Flank züngsem pezü kshasetba

atema tejashi nung nisung telok kati NSCN-IM indang Wung Tangkhul Region office nung mi senoktsü.

Iba tatalokba ajanga Tangkhul Naga region nung nübortem temulung raksar aser jashir. Külen tasür kibongtemi temeten meshia asüpila sentong agitsü memulunger.

GPRN/NSCN-IM züngsem pezü ya Honibar aonung Kamjong district kübok Kasom Khullen block nung tepset. Parnok ya Major Sochipem Phungshok, Sergeant Major Zairay Vasah, Sergeant Bahnlei Ahahpya, aser Sergeant Thansomi Washi nungeri ta jangjaogo.

GPRN Eastern Flank Naga Army-i sangdong ka nung asürtem mangyimba metetdaksüogo.

March 28 aonung Hongbei village junction nung Sihai Khunou nungi 2nd Lieutenant kati anir nisungtemi iba mapa inyak ta parnoki ashi.

Koridang nung by-election timi agitsü meranger

Mokokchung, 30th March (TYO): Tang aruya aliba 28-Koridang assembly constituency by-election dak sentakba nung Mangmetong yimdak timtem (complaint) kar aliba angashia 29th March, 2026 nü Deputy Commissioner office nung district administration den Sr. Superintendent of Police, Returning Officer (RO) aser Mangmetong Village Council telungjem senden ka mena telemetba tajung agiogo, ta 30th March, 2026 nü Mokokchung Deputy Commissioner, Ajit Kumar Verma, IAS-i osangbener kar den jembidang metetdaksü.

Senden nung iba dak sentakba tatsü talang aika jembiteper külen, Mangmetong Council-i Independent candidate Imchatoba Imchen declaration sentong magitsü noktangbaji

talisa yimdak tensa tia mejungi akümtsü arendaka bilemba agi liasü, saka pa (Imchatoba dang) declaration sentongji agitsü melatsü aser iba sentong akaba maparen nung akok tashi amaliteptsü, ta renemba ama ibaji mapa akümba osang (ATR) Council-i tanü (30th March, 2016) iba chittiji Imchatoba nem agütsüogo aser kasa chitti-ji DC nema copy tongtsüogo, ta Mokokchung DC-i osangzülurtem dang kuli sayua metetdaksü.

Aji dang masü, Mangmetong Council-isa aruya aliba by-election nung Koridang nungi tokteper candidate ajak nem yimdaki arua nübu ayimtsü melatsü ta iba senden nung renemba ka, Mokokchung DC-isa metetdaksü.

Iba senden nungi District

Administration aser Police-ia Mangmetong Village Council dang yimdak petsaperong kecha madoktsüsa nüngdakba security peria yoktsü aser tensa tia mejungi akümtsüsa maparen kar adokra yakta Concerned Sector Magistrate aser Sector Commander nem osang agütsütsü asoshi jembitepogo, ta paisa metetdaksü.

Iba den külemi ano 28th March, 2026 nü, Mangmetong Village Council-i chitti ka "nükmen : Mangmetong yimkong telemetba sangdonger" ta sür Ao oshi nung koba zülur perokshio, ibajia tekaratiba nung meyipa agitsü aser 30th March, 2026 tashi nung mapa akümba osang (ATR)-ji DC ket tongtsütsü jembia lir, ta paisa shisem. Iba osang zülü tashi nung iba chitti (ATR) matong

liasü.

Koridang by-election dak sentakba nung constituency kübok aliba yimtsüng ajak nung candidate -tem satematemata nübu yima jajatsü asoshi security peria yoktsü aser iba election yimjung nung tembangtetsü asoshi maparen balala meranga inyadkaki aser ECI inyakyim nung aliba ama shitak inyaksü, ta Mokokchung DC-isa metetdaksüogo.

28 Koridang A/C kübok polling station ajak senteper 30 lir, item rongnung 17 critical lir aser 13 vulnerable lir, aser postal ballot koba 4th April, 2026 nü agitsübaji lir, iba atema tenüng agütsürtemji parnok 200 dak tema lir, ta pai ashi. Polling station ajak nung security peria yoktsü, CCTV polling station ajak nung amenoktsü, election

tiptema agitetsü atema village council ajak den telungjem senden mena arudar, tang tasen kaji taoba mapang constituency shia sector 4 dang lemsar magistrate 4 dang agütsü saka tang yabo sector 6 den magistrate 6 kümtsüogo, ta paisa inyaka aruba kar lemsatep.

Koridang by-election dak sentakba nung control room ka lapoka lir, anungji, timtem kar danga adokra iba nungji yakta tongtepretepa teyari agitetsü akok.

Paisa temepishiba ka ashidang, election ka takok ngua agitetsübaji government kisüangi makoktsü, anungji, election tesünep aser yimjung nung agitsü asoshi "nübur teyari aser amalitep kanga aginür", ta ayongzük.

Neibodzelie KMC Chairman kumogo Kohima district nung April 10 nü merekmeju sentong ayonger



Kohima, Metsüremi/March 30 (TYO): Taoba Kohima Municipal Council (KMC) Chairperson temang nung timtem aliba ajanga mapa nungi anenba sülen Hombarnü ketdangpur tasen shimogo, kong Neibodzelie Solo Chairperson aser Thenusou Sekhose Deputy Chairperson asütsü shimogo.

Nagaland Municipal Act kübok Kohima Deputy Commissioner B Henok Buchem-i achaayanga iba election agiogo, shibai result sangdonga liasü.

Councillors 19 rongnungi 16 dena liasü aser parnok ajaki Solo aser Sekhose na pusema vote agütsü, ta pai ashi.

Result sangdongba mapang Buchem-i lenir tasentem nem tenüngsang agütsü aser parnoki nüburtem aser Kohima jila ajangzüksü atema inyaksü imla ataba lemsatep.

Lenir anaprongla ya Naga Peoples' Front (NPF) nungi liasü. Tena meshim tsüngda Neikhozo Suokhrie aser Khrielievi Chusi na temang manemba ajanga February ita mapa nungi anen. Tenaprongla NPF nungi liasü.

Election tembangba sülen osangbenertem den sensaksema mapang Ward 11 (PWD) nungi Solo-i, parnok dak

tamang katetba atema party tir aser Cief Minister Neiphu Rio densema party lenirtem aser külem councillor tem dang kanga pelaba lemsatep.

Pai, team tasenba yagi jila terenlok asoshi inyaksü tenangzüka agütsü liasü.

Solo-isa, taoba Chairperson aser Ward 6 (D Block) nungi Deputy Chairperson Sekhose na temang manenba ajanga mapa nungi anenba ya kanga dang tia maka ta ashi, saka council mapa maneni tejakdangi bener aotsü nangzüka liasü.

Kasa mapang nung Deputy Chairperson Sekhose-ia, democratic institution tem yongsü nung tayongzüka aika aliba indang jembiba, saka ashiba agi, council-i tang mapa tasak ka ajangetogo aser telungjem nung tejakleni aotsü. Laisa, jila nung infrastructure dak sendakba nung terenlok aser lokti ajangzüksü atema rangloker inyaksü alibatem indang lemsatep.

KMC staff tem nem itasen (ita trok) magütsü aliba ken o indang jembiba mapang Sekhose-i ashiba agi, iba ken o ya Urban Local Body (ULB) election magi tsüngda tenzüka ken o ka lir ta ashi. Laisa, tollgate nung sarusaji anendaktsüba ajanga senotsü

nung tetsükdaktsü adokba ajanga iba tebilemsü adoka liasü, ta ashi.

Inyakyim nung tetsükdaktsütem indang jembiba mapang lai, senotsü aazüksü atema lenmang peria maliba aser asset agi anüngba ajang council rongsenketzüng dak kongshir, ta ashi. Taoba mapang itasen magütsü aliba agütsütsü atema sorkari teyari agütsüba atema pelaba lemsatepba den laisa, council ya tangar dak ang metaloker alir asünung senotsü teyari talila nüngdaktsü ta shisem.

Maneni Sekhose-i ashiba agi, council ya tang tatentep mapang ka nung lir, kechiyong ULB elections ya küm metsü jungnüa lir külenang agi aser senotsü aatsü atema tang lenmang bushiba mapang lir.

Sentong nungsa NPF indang 9th Kohima Town Assembly Constituency tir Metekhrielie Mejura-i lenir tasentem nem tenüngsang agütsü aser councillor 19 pronglai party balala süaka longjemer nüburtem aser yimti tenzüksü imlaba lemsatep.

2024 KMC general elections nung NPF-i menden 13, NPP-i menden 3 aser Independent-i menden 3 koka liasü.

Dimapur, Metsüremi/March 30 (TYO): Kohima Deputy Commissioner, B. Henok Buchem, NCS-i sangdong ka ajanga, April 10 nü anepdang 7 ako nungi tenzüka Kohima District ajang nung merekmeju sentong ka ayongzüka agütsü ta metetdaktsüogo.

Iba dak sendakba nung Administrative Officers, office balala tekolaktem aser nüburtem dang iba merekmeju sentong nung jangrabangra arua shilem agütsü metetdaktsüogo. Office tekolaktem dang team ajak aser merekmeju sentong nung shilem agir ajaki hadir tapet bener arudaktsütsü atema jenjang tapet agütsü mepeshia metetdaktsüogo.

Team lenirtem dang jana bendena entoktsü atema gari aser machinery tem achaayanga ketdangsurtem den tongtepratepa inyaksü aser iba amala mesükba maparentem ajak April 9 nü tashi nungbo renema atatsü metetdaktsüogo. Maneni parnok dang janatem Meriema nung Kohima Municipal Council indang jana bendendak kanga junga entoktsü aser iba anogo

attendance agiba benoktsü metetdaktsüogo.

Kasa sangdong ajanga Outpost Area Administrative Officers ajak dang pa kübok aliba jila aser yimtsüngtem nunga kasa anogo merekmeju sentong ayongzüka agütsü tetuyuba agütsüogo.

Maneni Kohima Municipal Council Chairman dang municipal area tem nung ward councillor tem den tongtepratepa colony aser ward ajak nung merekmeju sentong ya ayongzüka agütsü mepeshia metetdaktsüogo.

Chief Executive Officer, Kohima Municipal Council dang Kohima Chamber of Commerce and Industry (KCCI) dang TCP Gate nungi Keziekie tashi nung dokantem parnok temeket merektetsü asoshi tetuyuba agütsütsü metetdaktsüogo.

Kasa sangdong ajanga, ADC Kohima, Ruopfukuotuo Noudi-i achaayanga merekmeju sentong ya agütsü ta metetdaktsü. Iba merekmejung sentong takok asoshi department, colony aser ward ajaki shilem agütsü mepeshia metetdaktsüogo.

Assam Rifles-i sensaksertem nem teyari agütsü



Dimapur, Metsüremi/March 30 (TYO): Assam Rifles-i Jalukie kübok lokti nung tangar memenep alirtem nem teyari agütsütsü asoshi jenjang agiogo. Tanü poksüng aazüka alirtem nem teyari agütsütsü nükjidong nung iba inyakyim ya benok, aser iba ajanga arrtsü nüka ataba mapa dak alia lokti ajangkettsü atema AR bendanga agütsür aliba sayur.

Tekübokba jenjang nung alirtem nem teyari agütsütsü atema Assam Rifles-i tama, anogoshia pei nüngdak peritsü makokba kanga sensak tia nung aliba kibongtem bushia ao. Iba inyakyim ajanga tenüngdakba osettem ochi

mashi inyakyim kecha medeni lemsütsü asoshi teyari agütsüogo.

Iba sentong ya Pink Blossom Society den longjemer inyaka liasü.

Telok ana longjemer nüngdaka alirtem nem chiyongtsü, sorchiok dang amshiba osettem, merekmejung dang amshiba osettem lemja liasü. Iba inyakyim tajung asoshi Jalukie nung alirtem aser yimtsüng nung yimtsüyimputemi kanga pelaba lemsatepa liasü. Iba amala inyakyim ajang security force aser Nagaland nung aliba nüburtem tsüngda tesendaktep tajungba kümdaktsür.

Mkg district administration & Longkhum Village Council senden amen



Dimapur, Metsüremi/March 30 (TYO): Taruba 28 Koridang A/C Bye Election dak sendakba nung Mokokchung District administration-i Systematic Voters Education and Electoral Participation (SVEEP) sentong den repsema Longkhum Village Council den coordination senden ka March 30 nü Longkhum yimtsüng nung ayongzüka menogo.

Senden nung sensaksema

mapang Mokokchung Deputy Commissioner, Ajit Kumar Verma, IAS, yimtsüng tejakleni anir aotsü atema lokti liba aser yimden yimsüsüba ajak nung lokti dang len sayutsüji village council khuret lir ta ashi.

Taruba Bye Election tesunep nung kecha tetsükdaktsü makai agütsü atema inyaksangshitsü asoshi village council ya sorkari tashi agütsür aliba lokti tentet ka lir, aser lokti nem tangazükba

agütsüba den lensayua temelenshi bener arutsü khuret tulu lir, ta pai ashi.

Paisa, election yimjung nung sadem sadema tebandang makai agitetsü asoshi electioneering machinery temi council den maneni tongtepratepa alitsü, ta metetdaktsü.

Awareness sentong agiba sülen Deputy Commissioner & DEO den ketdangsurtemi yimtsüng nung polling station ajak semdanga liasü.



March 30, 2026 nü New Delhi nung Census Planning, Implementation & Co-ordination atema Deputy Director General (DDG), Biswajit Das, Registrar General & Census Commissioner Mrityunjay Kumar Narayan aser Principal Director General PIB, Dharendra Ojha nungeri osangbenertem den jembidang tangokba noksa nung angur.

Maoists telungpurtem samatsütsü atema Parliament nung jembidi

New Delhi, Metsüremi/ March 30 (Agencies): Hombarnü Lok Sabha senden nung Maoists telungpurtem samatsütsü atema jembidang BJP aser NDA züngsemtemi, taoba mapang Congress-i aniba UPA sorkari Maoists mazüngokteti liasü, ta aitsü.

Congress züngsemtemia, UPA sorkar mapang nung Maoists nokdangtsü atema sorkari kanga meranga inyakogo aser kiralongra ajanga party nung tongti lenirtem aika samaogo, ta ashi.

Shiv Sena MP, Shrikant Shinde-i, BJP yimsüsüba kübok Maoists jenjang kanga mejungi kümdaktsüogo, ta metetdaktsü.

Shinde-i, "Taoba mapang sorkartemi mapang shidak nung tiyongtsüü ia inyak asübo iba tensa ya aziokteter lila, ajisüaka taoba mapang sorkar tashitamit liasü. Maoists anema raratsü atema yimtenren tsütsü temelungtetba maliasü aser nenok (Congress) asalentong tashimait liasü. Linük telung nungi linük tashi meitdaktsütsü atema inyak, bendangertemia

asalentong yanglua inyak aser Congress sorkar nung aliba mapang nung parnoki linük security atema meinyak," ta metetdaktsü.

Shinde-i, yaküm kija nunga Maoists 317 tepset, 862 apu aser 1,900-i surrender asü, ta ashi.

Paisa, "2024 aser 2025 küm Maoists lenir 28 tepset, aser parnok rongnung Central Committee lenir trok densema liasü. 2026 küm tenzüker tang tashi nung Maoists 630-i surrender süogo," ta metetdaktsü.

TDP MP Byreddy Shabari-i, "Congress yimsüsüba mapang nungsa Maoists-i amakba teimba liasü, ajisüaka Ato kilonser Narendra Modi aser Home Minister Amit Shah nati meranga inyakba ajanga Maoists tesamar dang," ta ashi.

Congress nungi Saptagiri Ulaka-i, UPA sorkari operation green hunt tenzüka liasü aser Maoists anema raratsü atema Commando Battalion for Resolute Action (CoBRA) tenteta liasü, ta metetdaktsü.

Ulaka-i, Chhattisgarh nungbo Maoists ajanga party nung tongti lenir aika samaogo, aser injang agi dangbo Maoists mesamatsütetsü ta tangatetba liasü, ta ashi.

TMC MP, Mahua Moitra-i, tang West Asia nung rara ajanga linük kanga mejungi kongshidar, anungji tongtibang onük aika nung o lemteptsüla, ajisüaka kechiba senden nung Maoists atema jembir, ta ashi.

Laisa, LPG aser totzü agi anünga den tayimtsü ticket jenjang kanga tuogo, ajisüaka sorkari parnoksa parnok tenüng asangtsü atema Maoists onük benoker, ta ashi.

Union Home Minister Amit Shah-i March 31, 2026 anogo tashi nungbo linük nung Maoists meshimeshia samatsütsü ta aiben sangdonga aruogo.

Tang state 9 kübok Maoists-i timtem agütsüba district 38 lir aser item state 9 ji Jharkhand, Bihar, Andhra Pradesh, Chhattisgarh, Madhya Pradesh, Maharashtra, Odisha, Telangana aser West Bengal state tem lir.

West Asia nung India nunger 8 süogo: MEA

New Delhi, March 30 (Agencies): West Asia nung raraba tensa tamajungba akümba mapang nung tang tashi nung India nunger 8 süogo aser ka samar mangur, ta Hombarnü Ministry of External Affairs (MEA)-i metetdaktsü.

West Asia tensa dak sendakba nung New Delhi nung osangbenertem den jembidang Additional Secretary (Gulf) MEA, Aseem R Mahajan-i, "Yashi tia makai Kuwait amakba mapang nung India nunger ka süogo," ta metetdaktsü.

"Onoki takoksa angur kibong den mangyim jashi lemsateper. Kuwait nung aliba Indian Mission-i takoksa angur kibong den tongtepratepdar aser tasü mangji India-i bener arutsü atema yangji aliba ketdangsertem den tongtepratepa inyakdar," ta pai metetdaktsü.

March 20 nüa osangbenertem den jembidang

Mahajan-i, West Asia tesem balala nung India nunger trok süogo aser ka samaogo, ta metetdakja liasü.

Hombarnü pai, "Tang tashi nung India nunger ti süogo aser ka samar mangur," ta metetdaktsü.

Tawa Saudi Arabia nung aliba Indian Embassy-i, March 18 nü Riyadh nung India nunger ka süogo, ta metetdakja liasü.

MEA-i, taküm February 28 nü Israel aser US nati Iran amakba sülen tang tashi nung West Asia nungi India nunger lakh 5.5 meyipa aruogo, ta metetdaktsü.

MEA-isa, ketdangsertemi Gulf aser West Asia region nung tensa maneni mita reprangdar, ta metetdaktsü.

MEA otongdar Randhir Jaiswal-i, "Onoki telok ajak dang atsü-anem akatsü mepishir aser tekaraba nung rara anentsü atema ken o jembitsü ayongzüker," ta metetdaktsü.



March 30, 2026 nü New Delhi nung West Bengal Pradesh Congress Committee Tir, Subhankar Sarkar-i TMC MLA, Kazi Abdul Rahim (abelen) Congress party nung agizükdang tangokba noksa nung angur. Kasa noksa nung AICC General Secretary, Ghulam Ahmad Mir-a angur.

BJP-i ozüng alema arur bendangertem meindoktsü: Amit Shah

New Delhi, March 30 (Agencies): Union Home Minister Amit Shah-i, West Bengal election nung BJP-i takok ngua sorkar kümra India-Bangladesh arrtsü nung atsü atsütsü atema ali lezmüktsüba maparen anogo 45 tsüingda renemtsü, ta metetdaktsü.

Amit Shah-i, "Ozüng alema bendangertem arua aliba atema Chief Minister, Mamata Banerjee-i Border Security Force (BSF) sepaitem nem tai tongloktsür. India-Bangladesh arrtsülen atsü atsütsü atema state sorkari ali melemzüktsüra BSF-i kechi inyaktsü? State sorkari metetsümonga arrtsülen atsü atsütsü atema ali melemzüktsür, kechiyong ozüng alema arur bendangertemji ruling Trinamool Congress atema tongti vote bank lir. Ajisüaka onoki ya nangzüker, assembly election agiba sülen BJP-i West Bengal nung sorkar akümtsü aser anogo 45 tsüingda arrtsü nung atsü atsütsü atema ali lezmüktsüba maparen renemtsü," ta metetdaktsü.

"Linük tesem ajaklen ozüng alema bendangertem aruba lenmangji tangbo West Bengal dang lir. Ajisüaka bendanger ajak meindoktsü atema BJP-i telemtetba agiogo. Iba vote ya pei temeden samatsü tsübuba

talenba nungi salaba vote asütsü, kiojen samatsü aliba nungi kümzüka vote asütsü aser pei sen tarulen lenmang samatsü aliba nungi kümzüka vote asütsü," ta paisa metetdaktsü.

Tang temzüng-ozüng tensa mejungi aliba dak sendakba nung Shah-i, Trinamool Congress yimsüsüba kübok West Bengal nung ketdangsubaren jenjang kanga mejungi kümogo, aser tangbo akhidang aliba Communist sorkar den medemdanga jembir, ta ashi.

"Tang aliba sorkar kübok tetsürtem anema inyakba tensa tamajungba kümogo. Tetsürtem anema inyakertemji Trinamool Congress den sendaktepa lir. Item ama ozüng alema inyakertemji koba party den tesendaktep lidir liaka temerenshi agütsütsüla. Tang BJP sorkar aliba state tem nungbo yamaji inyakdar. West Bengal nung election agia BJP sorkar akümba sülen state nunga yamaji inyaktsü," ta pai metetdaktsü.

Osangbenertem senden nungjisa Home Minister-i Bengal assembly nung opposition lenir, Suwendu Adhikari-i kanga tasü itta state sorkar anema ola adokba atema pa nem tenüngsang agütsü.

Kerala election nung UDF teloktepi takok angutsü: Ashok Gehlot

Jaipur, March 30 (Agencies): Hombarnü Congress lenir Ashok Gehlot-i, Kerala assembly election nung United Democratic Front teloktepi takok ngua sorkar akümtsü, ta ashi.

Kerala nung April 19 nü assembly elections agitsü.

Jaipur nung osangbenertem den jembidang Gehlot-i, tesüiba küm aika Kerala nung Left Democratic Front (LDF) aser

United Democratic Front (UDF) na sorkar melentepa arur, taoba mapang Congress-i menden aika nung takok nguaka sorkar mekümtet, ta ashi.

UDF teloktep nung Congress party ya tongti; iba teloktep nung Indian Union Muslim League (IUML) aser Kerala Congress factions densema lir.

Taoba mapang Rajasthan

chief minister Gehlot-isa, taruba election nung Congress-i menden aika nung takok angutsü imlar, ta ashi.

Gehlot-isa, Centre sorkari tim mesüi ED, Income-Tax aser CBI ama central agencies amshir, aser judiciary-a amshitsü meranger, ta aitsü.

"Tang linük tensa ya democratic rejutem atema teblemetsü akatsüsa lir," ta paisa ashi.



March 30, 2026 nü Chennai nung Tamil Nadu Chief Minister aser DMK Tir, MK Stalin-i Tamil Nadu Assembly election nung Kolathur constituency nungi tokteptsü atema nomination file asü dang tangokba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (METSUREMI) 31, 2026

Nepal nung Temelenshi

Taoba kum September ita nung Nepali nunger lanurtem, talisa 1996 kum nungi 2010 tashi nung asor telok, shirnok dang Gen Z telok ta ajar, parnoki anir Nepal lima nung pei ajungtsü aser pei akatsü asoshi dang bilemba ajanga nübortem timtemdaksüba yimten yimsüsürtem anema ain tulu adoka longkak aitba mapang, Nepali nunger nisung 77 khasetba den aika yiruba lendong atalokba sülen Prime Minister K.P. Sharma Oli-i aniba government anendaktsü aser taoba Obendanger tongti Sushila Karki nem election agia government tasen ka maküm tashi Nepal yimten bena atatsü nungloksü. Aji oda, ita trok tsüngda Sushila Karki leniba nung tan March ita nungsa election agia government tasen kümtedaktsüogo. Sushila Karki asoshi ibaji dang masü saka ita trok tsüngda nungsa, lai yaküm lanurtem longkak aitba mapang government-i tashiyim amshia longkak aiterem dena khasettsüsa inyakba nung aibelena alirtem bushisüngdangtsü asoshi luden ka shim aser iba luden jagi parnoki bushitetba osang Nepal nung government tasen makümdangtsüsa renemer agütsüba mapajia takok tuluka asütsü. Iba bushisüngdangba osang nung, iba mapang ato kilonser inyaka alisang K.P.Sharma Oli nem tai tonglokja lir aser pa pua item ken o asüngdangya tenzüksüla ta tebushitetba osang agütsürtem jagi shia lir. Aji oda, yaküm Gen Z teloki anir Nepal lima nung yimtem yimsüsürtem anema ain adoka longkak aitba mapang parnok pu asemsang, Engineer, tsüngsanga ken atener Rapper aser taoba Kathmandu mayor, arishi kum 35 tain, Balendra Shah, Nepal lima nung tang tashi nung tanubusang Prime minister asütsüsa, yimten mapa agizüka inyak tenzükogo. Atangji, Balendra Shah-i aniba Rastriya Swatantra Party (RSP) teloki election mapang "Melenshitsuäba Mapang" ta ayimtena nübo ayimba ama, Nepali nungertemi Nepal lima nung parnoki temelenshi tajung bener arutetsü ta amanga parnok shimtetogo. Atangji, Baleni aniba tasenba Nepal government asoshi nübortemi imlaba ajak ataloktsütsübo makoktsüa akok, ajisüaka parnokia parnok mapang aser mapa meteta, yimten mapa agizükli, Nepal lima nung temelenshi tasen bener arutsü atema mezüng mapa 100 inyaktsü asoshi sentong renemogo. Iba denji, Balen, Nepal prime minister aküm maküm ka, taoba ato kilonser K.P.Sharma Oli, taoba kilo kilonser Ramesh Lekhak aser taoba Energy kilonser Deepak Khadka nungertem pua tepuokdaki yokogo. Balen yagi tan election nung Jhapa-5 constituency nungi Communist Party of Nepal-Unified Marxist Leninist (CPN-UML) mendenbuba aser taoba prime minister, K P Oli madak takok tulu angu. Iba jagi, Nepal nungertemi Nepal yimten nung temelenshi ka kanga aginüa aliba mapa agi sayur. Balen-i aniba RSP teloki election mapang nübortem dang Nepal lima nung nisung shia rongsen jenjang tajungba akümstsü aser mapa ajak nung ochishia inyaktsü nangzüka lir. Ajisüaka, tajung saka ano tarendaktsü kaji, tang Nepal nung RSP teloki aniba government nung ato kilonseri anir yimten yimsüsürtem ya teimbaka arishi kum 50 teküpbok lir. Balen yabo arishi kum 35 dang lir aser ano pa den külem kilonser tazüngpurtembo pa dang nungi tanubo aser tanutsü purtem lir. Atangji, parnok ajakji tazüng temeteterem lir, ajisüaka yimten mapa nung tajangshiba mali tasen asünungji, aikati yimsü süpetdi sü ta arendaka bilemer. Atangji, taoba ato kilonser-i K.P.Sharma Oli-i anir pa den külem yimsüsürtem ajak taintem dang liasü. Ajisüaka, par lima aser nübortem asoshi tia maka kaji, ajak ajangshia metetba yimsüsür taintemi nübortem memeim parnok meyong ayur asünungji, nübortem asoshibo kecha anünga medoktsüi pei kibong ajungkettsü asoshi amshi. Aji oda, Nepal nung yimsüsürtem jala jabasotemi abenba yangku tilaka jenjang agi Nepali nunger kibong ka kum kabo chiyong shia asütsüsa azüker senzüdang, Nepali nunger kibong aika chiyongtsüa maka aser tanurtem kaketrejui meyoktet timtem tia nung liasü. Aji aiben taintemi yimsüsüba mapang liasü. Itemji kum 35 tain ser teküpbok lanurtemi melenogo. Atangji, mapangi dang ashitsü, saka tanü lima aser tanü putu nungbo lanur tazüng-temeteteremi yimsü asüba aser ketdangsbasa tajungba angur. Taintemi ochimashi inyakba ya lanurtemi maginer, anungji parnoki Temelenshi bener arur. Aji oda, Nepal nung ama asenoka 'Melenshitsuäba Mapang' tongja tongogo.

OLEMSABANG

MONGPU YIMYIM

~ Takowati Jamir Akhoya

(Yashi adok nungi...)

Joko meritsüng yutsür alulem benokdangbo mongpu khenyongi balaka melener tempang ajak nung tip asaba angashidang longmi tsüngsang aitdang ramen menah tsübua kazütepba to ya ati ta rajem. Lokmopidang tsüklamanung terotopong ka ketta tzüratzüpongba bilemteter. Moatsü lenpi manung moatsülong asaba ola anga-a medemsortem den alu talen alemshishia jajaba ya anibelemaka mamatetter. Tanabenbo Jamija sülen dang inyakdi ta pangjemtep.

Tokongtsüba ita nungbo meshi kolak nunga aei meyia tzünglu arurji meyilu inyakdangbo tzünglu ajali anü-a pulie ta moyatsü, merila, manganu, nuklarütsü, apong, pangchi aser metepoyatsü agi shirangah tenzüka metepdakjakasa alu talen aser chirong nung jangjang lozüng nahnüng ola angashidang tokronga amadokeranie.

Motong talang akümerji mongdishia apungnüaka mapongteti anü tatsük aser tzünglupu manung alu inyakaka alujung angudang pelateper Motong nung arah tapu tapu balala oda araji, kongrüla tuakasa joko tsüdokma-a oa shia aruba ngua molung sangwakasa ano pongzü züpi chir techanu anir ola-osüngba angashidang alu tenemsatsü nie ta tatayuyur. Meyi khonakba aitdangbo züngi, mendi lanu ongzüka achiba den kongyi-o aser rüpi konger petzüka lon süa achiba agi mongpu aru tali jangjar. Lozüng aturji okrema tako kümoko anungji asükwa saklokdangang chidangjanie ta menungra-a jempitep. Tsükma tera ngudarko, yakta onak ola angashitsü imlar ta yongyatepba pelatep. Ajidaka atongji tamendeni oa asenchi chiyongdangokonie.

Taküm-a Tsüngremmong jakdang Oboula Lijaba-i poksen asü yiprumopung bener arutsüjar ta nüngrüngtep, oda alu ayahtsüsabo tsüngsak mopung tarudaktsünie ta atar. Tsüngremmong sülenbo mapok tama rua yur rudi aroktsü tenzüka molok, pür, metetchi, chi, menja, motsüng pakti, pakrütsü, pakti, openji, tsükpong benoka yur kihu temedong tajung ka lepteta yuoko. Monü ayutsü monüjalen sapang ka yanglua zep ta renemoko. Alurudangbo oang, agiang, jungnie, bener oang, odinie ta mejembirako mesüra jendang nungi mi arrzüka bener modaktsürako kechiaser asen aren bener aor ta atetaponger. Saka arung, kua ta jembitep aser asen dangi aren arur ta imla. Alurur, mozür, monüter, monüjar, tsük meshia meteter telok telok aleptepba anibelem memeteti inyak. Jenji nung tokdenba masem agi sempak tashi alua tsük tokdena yur yimleni abentsü jangratep. Lulenabo tasak ta sür azük semtu nung yipba tsük aben. Lenmang talang asüba agi lendang semtu nung khen belena yur ki atong. Jenlang ka sünga tokdener anoh masemba agi jen tila ka sülok. Arenlongbo jen tuluba shiti tsükma nungji dang remoka yuangnei ta pangjemtep. Sangküm tawa taji tashi nungbo koyasüh yimchi eshikabo yatentetsü südi ta jempitep. Jen tilaba nungbo anong, mongsem aser tsükranong nungji dang tokdenangnei ta ajangshitepba inyak. Tatong tokdena yur jen meketta inyakteta meshitet. Joko tangbo chisang mapang nung anibelem ajak amaha pelatep. Tsüktem chiyong maliba agi sentsüh maka oda yimkong saru yimkong yimchi eshika agütsürbo onena yuokonie. Tanüh tara septeta yur külen pen sepjila aseptsü tenzükdang chironglen ayongnu nung kaku tena angu aser aloh tokdena arem remen pongsen sena anoh süngmang aser tempang nung ak-mak petzüka lon yanglua chiyongtepba agi anibelem ajak amadoker asükwa salok metetmeteta anü tatsüba akümdanganü pang nung pen senoka arondang angiepong yimang ta apongba anong yimzüdang shitsü anü tsüng-a tongdang.

Tsüah! ozü alu yimer mongpu taro tao memeteti alu wadang nung nokdaker arishi-a taoerani ta menungrasetter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Dimapur Ao Baptist Arogo (DABA) kübok Merali Fellowship nung March 29, 2026 anogo Palm Sunday sentep sentong nung Christian Education Ministry purtemi Yisu Yirusalemi takok ngua aiba jilushi aiba mapang agiba noksa ka yangi angur.

India nung Catholic Arogoi FCRA Amendment Bill anema ola adoker

March 30, 2026: Anogo ishika tejaklen Lok Sabha senden nung Union Home Minister Amit Shah tenüng nung Minister of State for Home Affairs, Nityanand Rai-i Foreign Contribution (Regulation) Amendment Bill, 2026 benokba sülen yimtenren party tem aser lokti tentetemi dang masü saka Catholic Arogoia iba Bill anema ola adokogo.

Catholic Arogoi, iba Bill ajanga sorkari minorities indang rejutem aser melungtet teloktem madak tashi amshitsü, ta metetdaksü.

Iba bill ya Foreign Contribution (Regulation) Act, 2010 yanglushitsü atema benok.

Iba bill tasenba ya ajanga FCRA registration thinenja aliba rejutem aser melungtet teloktem indang kiojentem madak ketdangser ka nem tashi agütsütsü. Iba sülen ketdangser jagi item kiojenji sorkar ministry kar, department mesüra agency kar nem agütsütsü mesüra ayokba sülen senotsüji Consolidated Fund of India senpong nung inoktsü.

Iba bill ajangasa sorkar dang nungi jelia temelaba magii FCRA bushisüngdangtsü makok aser aibelenertem küm ka nungi pongu tashi tepuokdak ayutsü akok.

Tang India nung associations/melungtet telok 14,996 dang lir, telok 21,954 indang registrations thinenja aser telok 15,174 indang 'expire' asütsüsa lir.

March 26, 2026 nü Catholic Bishops' Conference of India (CBCI)-i sangdong ka ajanga, iba bill nung lendong keta lir, ketdangsertemi temeden balala madak inyaksü nükjidong nung iba bill ya licence renewal tenüng atemer benok, ta metetdaksü.

"License renewal magizütsü aser thinenja atema Central sorkar nem tashi agüja lir, ajisüaka ozüng tasenba ajanga ketdangser ka nem tashi agüja nütsüng ajema alirtem meyong rejutem aser melungtet teloktem indang senotsü aser kiojen madak tashi agütsütsü

atema inyakba yabo tim masü. Iba ama telemtetba ya agizütsü makok aser inyakyim teladak tsütsü tashishitsü keta lir," ta CBCI-isa metetdaksü.

CBCI-i, kiojen soita ayutsü atema ozüng benokba ya democratic masü, temzüng anema aser tangatetba tai, ta metetdaksü.

Kerala Catholic Bishops Council Jagratha Commission-ia, iba Bill aser anti-conversion ozüng na tsüngda tesendaktep lir, ta metetdaksü.

KCBC Jagratha Commission secretary, Michael Pulickal-i, "Union Minister-i Prohibition of Conversion Act aser FCRA na ya kasa nükjidong lir, ta sangdongba ajanga communalism ajanga linük amokbangba kuli tejangjaba angur," ta metetdaksü.

Pulickal-isa, iba bill ya shisaliok rejutem, health rejutem aser social anema lir, aser yimsü nung ajemdaker inyakba

lir, ta metetdaksü.

All India Christian Council-ia, iba bill ya Dalit nungertem, tribal nisungtem aser sensakertem tenzütsü atema Khristantemi amenokba rejutem rakzütsü atema lir, ta aitsü.

All India Christian Council Tir, Archbishop Joseph D'Souza-i, "Iba tensa ya taoksatsüka lir aser iba nung ya lendong keta lir. Iba bill kübok RSS den sendaktepa aliba nisungtem nem tashi agütsütsü," ta metetdaksü.

Paisa, Waqf kiojentem dak sendakba ken o Supreme Court nung benoka aliba mapang ketdangsertemi Khristantem indang kiojen madak-a tashi amshitsü atema iba bill benoker, ta ashi.

"Tang benokba FCRA amendment ya Khristan rejutem indang kiojen sorkari agitsü nükjidong nung benokba asalendong lir," ta D'Souza-isa metetdaksü.

Israel police-i Yirusalem Tenla kidang Palm Sunday memongdaksü

March 30, 2026: March 29, 2026 nü Palm Sunday anogomong nung Israel police-i Khristan lenirtem Holy Sepulchre Tenla kidangi meidaksüba agi iba Tenla kidang Palm Sunday tekülem sentong magitet; tesüiba küm noklang aika tsüngda tang mezüng iba tekülem kidang Palm Sunday tekülem magidaksü.

Tang Iran den rara aliba ajanga Yirusalem nung aliba tekülem ki aika shibangja lir.

Catholic Arogoi, police inyaksangshi ya kuli kecha makai tim masüba nung inyakba lir, ta metetdaksü.

Police-i Cardinal Pierbattista Pizzaballa aser Jerusalem nung Custos tongti na iba Tenla ki telungi aitsü memela.

Khristantemi iba tesem ya Yisu Kangki nung metaba tesem lir, ta amanga iba tesem nung Holy Sepulchre Tenla ki asü.

Palm Sunday ya Yisu Khrista Yirusalem-i aiba anogo aser Temeshi hopta tenzüka

anogo lir; Temeshi hopta ya Easter Sunday nü tembangtsü.

Israeli police-i, tang rara mapang lir, anungji nisungtem kümzüka alitsü atema Palm Sunday nü tekülem sentong magitsüla, ta parnoki jelia Catholic Arogo nem metetdaksür liasü, ta metetdaksü.

Yirusalem yimti tejenba nung emergency garitem senzütsüsa lenmang sademsadema mali, iba denji külemi missiles/bomb lendong nungi jenoktsüsa shelters peria mali, ibayongji iba tekülem kidang tekülem sentong magitsü metetdaksür liasü, ta police-i ashi.

Ajisüaka Latin Patriarchate otongdar, Farid Jubran-i, "Iba anogo ya Khristantem atema kanga temeshi anogo ka lir, anungji iba ama anogomong ka nung Tenla ki telungi lenirtem meidaksütsü telemtetba agibaji tim masü," ta metetdaksü.

Jubran-i, Amongnü tekülem agitsü atema yimsü lenirtem

ANOGO ABEN TSÜNGREM DEN

Temulung ana sentong

"Temulung ana adenba pur Kibuba nungi langka angutsü ta tebilem, pa pei yimya ajak nung mesüngjem" (Yakob 1:7,8).

Kodang Tsüngremi bilemba aser nai bilemba maneni tsüktepdar na tanela nung maintsü, aser Khristan ka ama nai anogo shia ajangshiba jagi na majungmesotsü kechiaser ne tebilemba jagi Tsüngrem tebilemba tsükdanger. Lenmang ana ajanga Tsüngrem tebilemba tsükdanger.

Mezüngbuba, ne shi jagi meimchir taginüba aser tebilemba bener arur. Na Khristan mekümi aliba mapang ne shi-i kechi mulung iba nung lia aru. Iba mapang na Tsüngrem nungi pilar liasü. Pa den sendaktepa alitsü kecha sentong mali asü. Ne tashi agi takok angutsü bilema merang.

Kodang na tanaben aso, Tsüngremi ne nem yimya tasen ka agütsü, saka yimya tasen denji tejen yimya dena bener aru nung tejenba jagi shi-i bilemba inyaksü ajungshir.

Tanabuba, tetenzük nungi Tsüngremi mulungba anema inyaker nübu ka lir. Pai Eden tsüki nungi tenzüka Tsüngremi yangluba anema inyak. Satani aser pa teloki teti tamajung inyaksü bilemer, alima shisatsü, tebilemba ne nem teti agütsür.

Ne mulung nung teti iba rara ana lir. Tsüngremi mulungba nokdangtsü merangba tashiji koktettsüsa nü dak tanela temeshi alitsüla.

Ni alima madak takok ngua alitsü tashi agütsüba asoshi Ne tenüng asanger. Shi sentong masü, Ne sentong shimtsü ni yariang.

kar nem temelaba agüjang ta Arogoi police dang jelia mepishir liasü, ta metetdaksü.

Teti agia küm shia Palm Sunday anogomong nung Khristantem meyrjang aika adenshia Olive tenem nungi Yirusalem yimti tejenba tashi yimdong süa jajar, ajisüaka takumbo rara aliba ajanga Arogoi yimdong süa jajaba sentongjibo thinener liasü.

Police-i Cardinal Pierbattista Pizzaballa Holy Sepulchre tenla kidangi aitsü memelaba agi pai anasa aliba St Savior's Monastery nung ang tekülem agia liasü.

Amongnü nikongdang Cardinal-i Olive tenem nung aliba Dominus Flevit Shrine nung yimjung atema sarasadema liasü.

St. Peter's Square nunga tekülem sentong tembanga Pope Leo XIV-i Middle East nung Khristantem atema sarasadema liasü.

Yirusalem nung aliba Holy Sepulchre nung tekülem

sentong agitsü memelaba atema Israel ketdangsertem aika Italy Ato kilonser, Giorgia Meloni-i, "Yirusalem nung Holy Sepulchre Tenla ki ya Khristantem atema kanga temeshi tesem ka lir, anungji tekülem sentongtem agitetsüsa iba tesem kümzüka ayutsüla. Palm Sunday ama temeshi anogo ka nung Patriarch of Jerusalem aser Yirusalem nung Custos na iba tekülem kidangi meidaksübaji tamangertem anema inyakba dang masü saka yimsü temeden atema inyakertem ajak anema inyakba lir," ta metetdaksü.

Israel o Gaza na tsüngda raraba dak sendakba nung Meloni-i aniba sorkari, Israel-i parnok kümzüka alitsü atema inyaksü Israel dak temeden lir ta ashir, ajisüaka Palestine nunger aika tepsetbabo aitsür.

Meloni-i, Israel-Iran rara nung Italy-i shilem magitsü, ajisüaka Islamic Republic of Iran ket nung nuclear hadir memelatsüla, ta ashi.

MOLUNGNEN O



Imkongmangyang Paul

17.05.1977 - 18.03.2026

Asür **Imkongmangyang Paul** iba lima nungi pilaba ajanga onok mulung züreba asüko tia nung alidang kwikadi onok den mulungsüngzük süneptsüba ola bener mapang agüja tsüngdong aruba, rongsen tenla aser sarasadema onok nungitogo, ozüi nenok ajak dang ozü mulung ajak agi kanga pelaba metetdaksür. Tematiba Tsüngremi nenok temeim mapa tajung maneni uludakja nenok moajangma ta ozüi sarasademtsür.

**Temeim Kinungtsü, Chirnur,
Tzürapur aser Adianu.**

MULUNGNEN O



TASOBA : 17-11-1935
TASÜBA : 25-3-2026

Onoki teti meima aliba Obala **Merenjenba Jamir** (Ungma) pa shirang yipden Nung aliba mapang nungi tempangba anogo tashi shirnokisa nübu, rongsen, aser sarasadem agi yaritepago.

Nenok ajak dangi Tsüngdong arua meshitet nung iba Osangkaket ajanga nenok mapa tajung asoshi Kanga pelaba lemsateper, Teyanglur Tsüngremi nenok ajak maneni moajangma.
Chirnur & Semchir.

EMERGENCY SALE

Ali tesazük **106000sqft** shi nung rubber tong 500 shi tang teyimdak (harvesting)

TAYOKTSÜ

Tuli Paper Mill (Tzüdikong-Amguri Road 10th Mile nungi furlong ka shi pilar lir. Talitsü ki (RCC), smoke house, rubber machine aser osettsüset ajak peria lir. Jenjang Rs.50/sqft only (*slightly negotiable*) No Broker. **Contact: 9615445779**

LIR

OFFICE OF THE INTERNATIONAL PRAYER CENTER KHUTAK LONGJANG

SANGDONGER

Mr. Ajasoba Pongen (Japu Village) International Prayer Center Khutak nung Chaplin mapa inyaka arur mapa nungi anentsü tezüluba nung zülur Committee nem agütsü aser Committee-i pai meshiba ama mapa nungi 1st February 2026 anogo nung anenogo, anungji I.P.C. Khutak nung metetpela/asüngdangya iba mobile number nung süangma.

M/ 9862168998 / 8730043536

**Chairman
International Prayer Center
Khutak, Longjang
Dist. Mokokchung**



GOVERNMENT OF NAGALAND DIRECTORATE OF HIGHER EDUCATION NAGALAND, KOHIMA

www.highereducation.nagaland.gov.in

dir.highedu@gmail.com



NO.HED/HOST/1/2016

Kohima, Dated the 30th March 2026

NOTIFICATION ON NEW HOSTEL REGISTRATION FOR POST MATRIC STUDENTS

It is hereby notified for general information that the Directorate of Higher Education (Scholarship Section) will issue application forms for **New Hostel Registration** for Post-Matric Students from **6th - 30th April 2026**. The last date for submission of duly filled application forms is **8th May 2026**. No applications shall be entertained after the stipulated deadline. Individuals/organizations intending to run hostels for Post-Matric students may collect the prescribed application forms from the office of the undersigned within the specified period.

Further, all hostels already registered under this Directorate and due for renewal must submit the Hostel Eligibility Certificate for renewal process within the prescribed time. Failure to comply shall result in automatic cancellation of the hostel registration, and such hostels shall be treated as null and void without further notice.

It is also hereby clarified that the **Hostel Eligibility Certificate** is issued strictly for the purpose of facilitating scholarship benefits to Post-Matric students residing in eligible hostels, in accordance with the prevailing scholarship guidelines. Any misuse or misrepresentation in connection with the Hostel Eligibility Certificate shall invite strict action as per applicable rules, and the concerned individual/authority shall be held solely responsible.

**Sd/-
(V. LOVITOLY SEMA), NCS
Ex-Officio Director
Higher Education
Nagaland: Kohima**

Min Aung Hlaing-i Myanmar junta tekolakba mapa toktsüogo

Yangon, Metsüremi/March 30 (Agencies): Myanmar armed forces tekolakba Min Aung Hlaing-i Hombarnü pa mapa toktsüogo. Pa linük tir akümtsü merangba mapang tang iba jenjang ya agiogo.

December aser January ita linük ajunga nung election agia military-i nongitba party-i election akokba sülen tang iba

jenjang ya agiogo. Iba election ya United Nations aser anüolen aliba linük aikati aija liasü.

Military-i Nobel Peace Prize ngur alila Aung San Suu Kyi-i aniba sorkar atsüngtokba sülen linük ajunga nung nüburtemi longkak ait tenzü, koba military-i tashiyim amshia azüoktsü merangba ajanga

mepetmesü tuluba kümdakja liasü.

Civil war koba tang tashi raradar, iba rara nung ya tang tashi nung nisung 93,000 shi tepsetogo aser nisung million 3.6 dak tema pei talidak ki toktsür jenshia odaktsüogo, iba den linük rongsenketzünga tashi meiti kümdaktsüogo.

(Maneni tapak 8 nung...)

Iran aser Yemen nati maneni Israel amaker

Washington, Metsüremi/ March 30 (Agencies): Israel military-i Hombarnü sangdong ka ajanga ashiba agi, Iran-i Israel dak missile aika khaloktsüogo aser U.S aser Israel nati Iran amak tenzüka sülen Yemen nungia tang agi tanabenbuba Israel makogo.

Military-isa, Yemen nungi yokba drone ana Hombarnü anepdang züngia lia nokdangogo, ta metetdaksü, saka iba dak alaka osang talila magütsü. Yemen nung Iran-i teyari agütsüba Houthi teloka iba rara nung Honibarnü nungi dena parnoki Israel dak missile khalokja liasü, aser iba ajanga Middle East nung iba rara ya tali tuluba kümdaktsüogo.

Israel indang military-isa, Air Force-i Hombarnü anung ajanga Tehran nung military infrastructure tem makogo, ta ashi. Tir Donald Trump-i, US aser Iran na lenmang balala nungi ajurutepa senden mendar ta ashiba den US nunger sepaitem timba iba tesemi aruba mapang Iran nunger lenir tasentemi ken o kanga junga angateta inyakdar ta ashiba sülen linük ana yagi kati ka maktepogo.

Tehran aser Washington na tsüngda yimjung atema Pakistan teyongtsüi ia inyaksangshidar aser parnoki ashiba agi, iba rara tembangdaksütsü asoshi taruba anogo ishika tsüngda sensaksem

ka ayongzüka agütsü renemdar. Iba seden nung adentsü atema US aser Iran nati mulunga agizük magizük iba indang osang tejangja memetet.

"Parnok den tenanzüktepba ka yanglutettsü ta bilemer, saka onoki tenanzüktepba ji meyanglutsüa akok," ta Trump-i Deobarnü nikongtsütsü osangbenertem dang ashi.

Trump-i ashiba agi, US-i linük lenritem rongnung tongtiba aser tanga tongtibang ketdangsrütem tepsetba sülen Tehran nung yimsüsüba melentsütsü asoshi takok nguogo ta bilemer, aser parnok melenertem yagi atsüanem taliba akar ta bilemba lemsatepogo.

February 28 nü Israel-i Iran amakba mapang parnok lenir Ayatollah Ali Khamenei tepset, shiba par jabaso Mojtaba-i melenogo.

Iba rara nung Middle East kübok tesem balalai prokshia oa nisung meyrejang aika tepsetogo aser iba den energy supply nung tetsükdaktsü adokba ajanga alima rongsenketzüng dak kongshir lir.

Iran indang parliament speaker, Mohammad Baqer Qalibaf-i, rara anentsü atema sensaksemtsü akok ta osang balala yokba den kasa mapang nung ali nungi Iran amaktsü sentong yangluba atema US aitsüogo.

(Maneni tapak 8 nung...)

Mokokchung Inter-Ward Football Tournament osang



Mokokchung Inter-Ward Football Tournament tournament mezüngbuba Quarter Finals Penli Ward aser Süngkomen Ward tsüngda asayaba mapang tangokba noksa.

Mokokchung, Metsüremi/ March 30 (TYO): 7 Buba Mokokchung Inter-Ward Football Tournament-2026, Marepkong Youth Association-i ayongzüka "Rise As One" ta asüba omen nung ajemdaker Senayangba Govt. Higher Secoundary School Ungma nung asayadagi. Tanü iba tournament mezüngbuba Quarter Finals Penli Ward aser Süngkomen Ward tsüngda asaya nung asaya tenzüker minute 5buba nung j.no-7 Tarepnungsang-i goal-1 yok, iba sülen ano kasa telok nungisa minute 60buba nung j.no-23 Temsüyanger-i goal-1 yoktet aser anosa minute 92 buba nung j.no-7

Tarepnungsang-isa goal-1 yokteta item goal-3 jagi Penli Ward ayong ayonga kokteta Süngkomen Ward Semi Finals asayatsü maongka ngutetogo. Kasa anogosa Marepkong Ward aser Artang Ward tsüngda tanabuba Quarter Finals asayadang anisüngzüka mapang agi tashi nung telok katia goal meyoktet. Tanaben ground-i aita asayaba mapang minute 46 buba nung Marepkong telok nung j.no 11 Imlisanen-i goal-1 yokteta par telok takoklen aküm. Sakasa tia maka minute 56 buba nung Artang telok nung j.no-19 Intimayang-i goal-1 metsüokja telok ana

kasasa akum. Iba sülen Artang telok nungisa minute 71buba nung j.no-11 Chubalemba-i goal-1 yok, minute 73buba nung j.no-5 Tongpangkba-i goal-1 yok aser tatensa minute 87buba nung j.no-11 Chubalemba-i goal-1 yoktet nung Artang Ward-i goal 4-1 agi Marepkong Ward kokteta Semi Final asayatsü maoangka ngutetogo. 31-03-2026 anogo mezüngbuba asaya nikongdang 1:00 ako nungi tenzüka Sangtemla Ward aser Tongdentsüyong Ward asayatsü aser tanabuba asaya nikongdang 3:00 ako nungi Arkong Ward aser Mongsenbai Ward asayatsü.

Jannik Sinner-i Miami Open final nung Lehecka kokogo



Metsüremi/March 30, 2026 (Agencies): Grand Slam pezü koker aliba asayar Jannik Sinner-i Deobarnü Miami Open final nung Jiri Lehecka 6-4 6-4 agi straight set nung koka set ka nung danga tamakok mongui Sunshine Double akokba mezüngbuba asayar kümogo. Tang tashi nung tetsür aser tebur asaya naprongla nung asayar kati danga iba ya ajangzükteta mali. Final asaya ya tzülu aruba agi minpronga liasü, saka pai kecha timtem makai iba asayamung kokteta 2017 küm Roger Federer sülen California aser Florida na nung iba asayamung ana akokba

mezüngbuba asayar kümogo. Sinner shibai 2024 küm Miami Open akok saka tenokdangba agütsür aliba mozü amshiba atema ita asem tenokdangba agütsüba ajanga iba asayamung nung taruba küm masayateti liasü, pai tang Masters 1000 titles asembuba atonga kokogo, koba taoba küm Paris nung tenzüka liasü. 1990 küm sülen Sinner ya surface ka nung dang ATP Masters 1000 title tenet akokba asayar tasembuba kümogo. Michael Chang aser Andy Murray nati hard court nung asayamung tenetnet koker liasü. "India Wells sülen idaki maneni kanga junga asayatetba

atema kanga pelar. Ni iba ya koktettsü ta bilema maliasü, kechiyong iba ya akoktsü temela masü," ta Sinner-i asaya tembangba sülen ashi. Sinner-i takok anguba den Aryna Sabalenka-ia Coco Gauff koka iba asayamung akokba ya Novak Djokovic aser Victoria Azarenka nati 2016 küm tetsür aser tebur Sunshine Double abenba sülen tang mezüngbuba asütsü. Iba asaya akokba sülen Sinner-i world number 1 Spain nunger asayar Carlos Alcaraz tera agi dang memenepi kümogo, shiba tasembuba round nung tsüka liasü. Asaya tetenzüklen Sinner-i mezüngbuba set kokli tzünglu aruba ajanga ghonda ka shi asaya anena ataba sülen maneni ano mapang tatsüka dang lir minute 90 shi tzünglu agi minpronga liasü. Ajisiüka iba ajanga Sinner asaya dak mekongshi, shibai ace 10 ao aser pa indang mezüngbuba serve point 36 nungi 33 koka liasü. Tanbuba set nunga Sinner-i Lehecka indang serve ka break asü aser pai asaya 6-4 agi koka liasü.

BENDANGLI OSANG : Tapak 7 nungi...

Iran aser Yemen nati maneni...

"Iran nem bendanga agütsütsü atema America-i khangra onok telangzübaji ya dang, onoki kodanga mezüngmeshi maksü magizüütsü," ta pai ashi. U.S. Department of Defense-i Middle East-i sepaia aika yokogo, aser iba yagi ali ajanga amaktsü asoshi Trump nem lenmang lapoktsüogo. Israel military-i ashiba agi, parnoki Tehran densema taoba ghonda 24 tsüngda anüing ajanga Iran anüolen aser teyongtsü nung tesem balala 140 ben makogo. Iba mapang parnoki ballistic missile yokba tesemtem aser prangbong injang rezünga ayuba tesemtem raksatsüogo. Iran indang state media-i, Israel-i Mehrabad airport aser Tabriz yimti nung petrochemical plant ka maka liasü, ta metetdaksü. US aser Israel nati hopta pezübuba Iran kübok tesem balala makdar, saka iba ajanga Iran indang missile aser drone battery tem mazuökteter aser Kuwait-i Hombarnü ashiba agi, parnoki parnok tazüokba kübok aliba tesem nung drone pongu nokdangogo. Iran-i yokba missile aika khadangtsü merangba mapang Beersheba yimti anasa southern Israel nung chemical plant ka Deobarnü missile ka mesüra missile tejaksa agi kongshia liasü. Kasa mapang nung Iran-i Strait of Hormuz maneni nokdangdar. Iba tesem ajanga alima nung totzü aser gas shilem 20 shibelener aser iba tzü

lenmang ya shibanga ayuba ajanga totzü jenjang tali kümogo aser linük balala nung rongsenketzüing dak kongshio. Iran den sendaka aliba Houthis teloka Honibarnü nungi iba rara nung denogo aser parnoki Bab el-Mandeb Strait shibangtsü amokmerenogo. Iba tzü lenmang ya-a khu abenba rongtem senzüsenpongtsü atema kanga dang tongtibang lenmang ka lir. Maneni Middle East-i special operations personnel noklang aika yokogo, ta New York Times-i Deobarnü sangdong ka ajanga metetdaksü. Hokolbarnü amphibious assault rong ka nung U.S. Marine meyrejang aika aruba sülen Deobarnüa sepaitem ya yokogo, ta U.S. military-i ashi. Ali ajanga Iran amaktsü atema Pentagon-i asadangdar ta Reuters-i metetdaksür liasü, ajisiüka Trump-i ibala sentong kecha agizüka mali ta news outlet balalai metetdaksüogo. Israel Ato Kilonser Benjamin Netanyahu-i Deobarnü ashiba agi, pai southern Lebanon nung military inyakyim atsülangshitsü tetuyuba agütsüogo, kechiyong Iran-i teyari agütsüba Hezbollah teloki maneni rocket tem yoka Israel makdar. Israel-isa, Hezbollah anema parnoki "buffer zone" ka yanglutsü atema southern Lebanon atsünga aotsü ta shio, aser iba ajanga Lebanon nungertem tetsübu agi süngdaksüogo.

candidate ama sangdongogo. Linük upper house-ia vice-presidential candidate ka nominate asütsü aser house anapronglai item candidate tem rongnungi tir ka shimtsü. Iba election atema anogo mesangdongi lir. "Senior General Min Aung Hlaing vice-presidential candidate ka ama nominate süogo," ta USDP MP Kyaw Kyaw Htay-i parliament lower house nung metetdakja liasü. Linük yimtiba Naypyitaw nung tanga sentong ka nung Min Aung Hlaing-i armed forces indang commander-in-chief mapa ya Ye Win Oo nem agütsüogo, shiba pa den kanga junga sendaktepa lir. Ye Win Oo ya 2020 küm Myanmar indang intelligence tekolakba asütsü shim aser iba ita tetenzüklen commander-in-chief of the army jenjangi ajungketja liasü.

Min Aung Hlaing-i Myanmar junta tekolakba...

Linük nung rara adoker liaka junta-i election ayongzüik, kong Suu Kyi-i aniba party aser tanga opposition teloktem metoktepdaksü, aser iba ajanga military-i nongitba Union Solidarity and Development Party-i ayong ayonga takok ngua liasü. Civil war ajanga military' meraket mejungi kümdaktsür liaka Min Aung Hlaing-i mapang talang ka nungi pa ya officially linük tir akümstsü meranga aruogo, ta Reuters-i mettedaktsü. "Iba ya Min Aung Hlaing indang nükjidong liasü," ta independent analyst Htin Kyaw Aye-i ashi. "Military lenir ka ama yimsü süa aliba nungi tir ama yimsü asütsü melenerba dang lir." Parliament lower house nung tawa shimba ozüing yanglurtemi Min Aung Hlaing den tangar ka vice-presidential

candidate ama sangdongogo. Linük upper house-ia vice-presidential candidate ka nominate asütsü aser house anapronglai item candidate tem rongnungi tir ka shimtsü. Iba election atema anogo mesangdongi lir. "Senior General Min Aung Hlaing vice-presidential candidate ka ama nominate süogo," ta USDP MP Kyaw Kyaw Htay-i parliament lower house nung metetdakja liasü. Linük yimtiba Naypyitaw nung tanga sentong ka nung Min Aung Hlaing-i armed forces indang commander-in-chief mapa ya Ye Win Oo nem agütsüogo, shiba pa den kanga junga sendaktepa lir. Ye Win Oo ya 2020 küm Myanmar indang intelligence tekolakba asütsü shim aser iba ita tetenzüklen commander-in-chief of the army jenjangi ajungketja liasü.

BILEMDANGANG
"Nai kanga karaa tongnüra
len tejenba leni oang"